

जनगणनाय् नेवाःतय् ल्याः

ःह्यवःह्य
सत्यमोहन जोशी

नेवाः जाति व भाषा विषयक तःमुंज्या
ने. सं. ११११ सिल्लागाः ३० व चिल्लाथ्व १
(२०४७ फागुन २ व ३ गते)

भाषा म्वाःसा जाति म्वाइ

— महाकवि सिद्धिदास महाजु

झीगु नेपाः दे विश्वय् दकसिबय् तःजाःगु च्वापुगुं बा बबसं “४ बर्ग
 व ३६ जाति मनूतय्गु केब” या नामं प्रसिद्ध जुयाच्चंगु जुल । थथे धयागु थन
 देशय् थी थी मांभाय् ल्हाइपिं, थी थी थितिरीति दुपिं थी थी जनजातिया मनूतसं
 थी थी अश्वलय् बसोबास यांनाच्चंगु जुल । थुपिं फुक नेपाःमि, नेपाःदेया हे
 नागरिक, छगूहे राष्ट्रियताया दुने व्वल्हनाच्चंगुपिं ।

नेपाःदेयागु राजधानी ये दे दुथ्यानाच्चंगु थाय् स्वनिगः (काठमाडौं
 उपत्यका) खः । थ्वयात नेपाःगाः व गाःदे नं धायेगु चलन दु । अले नेपाःदेशय्
 दुने च्वंपिं थीथी जनजातित मध्ये छथ्वः च्वन्ह्यानाच्चंगुपिं जाति नेवाःत खः ।
 थ्व नेवाः जातिया मनूत स्वनिगःया मूल बासिन्दात खः । लिपा थ्वहे नेवाः
 जातिया मनूत स्वनिगलं पिने थीथी अश्वलय् नं थातं च्वोंवंगु जुल । थथे
 धयागु नेवाः जातिया मनूत नेपाल अधिराज्यया दुने नाला, सांगा, पंति,
 भोत, धौख्यः, पलांचोक, चौतारा, तीथली, सिन्धुली, झांगाझोली,
 रम्झाटार, दोलखा, ओखलढुंगा, भोजपुर, धनकुटा, तेह्रथूम, चैनपुर, इलाम
 आदि थासय्, अथेहे हानं नुवाकोट, गोरखा, आरूघाट, लिगलिग, खान्चोक,
 तनौ, रिसिङ्ग, घिरिङ, काहुँ, बन्दीपुर, पोखरा, स्याञ्जा, पाल्पा, बागलुङ्ग,
 प्यूठान, सल्यान, जुम्ला, बैतडी आदि पहाडी थासय्, तथा भीमफेदी, हेटौडा,
 बीरगंज, मलंगवा, सर्लाही, सप्तरी, बिराटनगर, झापा, बुटवल, नारायण-
 घाट आदि भित्री मधेस व तराई क्षेत्रय् नं न्यनावन । थथेहे हानं थ्व नेवाः
 जातिया मनूत नेपाल अधिराज्यं पिने नं गथेकि खासा, झिखाछेँ, ल्हासा,
 अथेहे बेतिया, सिकिम, दुप्पा, जलपाइगुरी, दार्जिलिङ्ग, आसाम आदि थासय्
 नं बसोबास यायेत थ्यंगु जुल ।

नेवाः जातिया मनूतय्के न्हापांसिंहे छगू तःधंगु विशेषता दयाच्चंगु
 जुल । थुमिसं स्वनिगलय् बुँइ कँगाः ह्युयाः कँ कायेसयेकल, कँयात साःयागु
 रूपय् छथलेसयेकल, स्वनिगःयात उर्वरा भूमिस परिणत यात । अले थथे
 बूँज्या यायेससेलि थुमिसं नेवाः सभ्यता व संस्कृतिया क्रम न्हाकल । थुमिसं
 बास्तुकला, शिल्पकला, ललितकलायात च्वन्ह्याकाः आपलं बांबांलागु छेँ,
 देगः, बाहाबही, सतः दयेकल, थीथी सांस्कृतिक मूल्यया थितिरीति, जात्रा,

अक्षः प्रखः; गुप्ति हनेगुषातः । लिपा धुमिसंहै थःपिन्सं ल्हाना वयाच्वनंगु मांभाय् (मातृभाषा) यात थःपिनिगुहे लिपि दयेका च्वयेगु, व्वनेगु व सुरक्षित यायेगु पद्धति नं व्वल्हंकल, ऐतिहासिक हलंज्वलं नं जायाच्वंगु शिलापत्र, ताम्रपत्र, सुवर्णपत्र, तालपत्र च्वयेगु प्रचलन पिकाल, अथेहे ज्ञान विज्ञान, धर्म दर्शन, तन्त्र मन्त्र आदि थोथी विषयवस्तुया ध्यासफू, पौसफू च्वयेगु यात, नीलपत्रय् लुंयागु, बहयागु मसीतकनं धर्म ग्रन्थ च्वयेगु पद्धति व्वल्हंकल । नेवाः जाति-यागु सांस्कृतिक व साहित्यिक धुकू क्वातुक्क दुग्यन ।

छता खँ थन न्ह्यथनेबहःजू- व खः स्वनिगल्य् प्राचीन समययागु मुनिनं शिलालेखत प्राप्त जूवल उकी गुप्त लिपि, कुटिला लिपिसं संस्कृत भाषाया खँ जक दुथ्याकातःगु जुल, उकी नेवाः भाषा व नेवाः भाषाया लिपि खने मदु । तर थ्वया अर्थ उगु इलय् स्वनिगल्य् खँल्हाबल्हा यायेगु भाषा संस्कृत मखु । संस्कृत ला मृतप्रायःहे जुइधुकूगु जुल, अथेनं संस्कृतयात विद्वद् समाजय् व राज्य शासन प्रणालीस छचलातःगु जुयाच्वन, शासकतय्गु आदेश, इस्तिहार व अभिलेखया रूपय् माःयता बियातःगु जुयाच्वन । अले उगु इलय्हे नं संस्कृत अभिलेखया दुने गुलिखे नेवाः लोक भाषाया खँग्वःत गथेकि गुँ, साह्रिगुँ, सिँ आदि खँग्वःत दुथ्याकातःगु जुल । अझ गुलिखे नेवाः लोक भाषाया खँग्वःयात संस्कृतीकरण नं यानातःगु जुइफु गथेकि यल अथवा यलसिँया यूप ग्राम, येँगाःयात इन्द्रगूह, चंगुँयात दोलाशिखर, साह्रिगुँयात गोश्रृङ्ग पर्वत इ० । अझ भाषाविद् डा. कमल प्रकाश मल्लजुया धापूकथं नेवाः लोक भाषाया 'ड हे पा' (सा मे जवा) संस्कृतीकरण जुयाः 'नेपाल' धयागु खँग्वःहे सिर्जना नं जूगु जुइफु । थुकि प्राचीन समयस अर्थात् लिच्छविकाल पाखेहे अभिलेख आदि तयेगुली संस्कृत भाषाया महत्वपूर्ण स्थान च्वंगु जूसां लोक भाषाया रूपय् नेवाः भाषायागु अस्तित्व व विकास क्रम नं व्वल्हनाहे च्वंगु खने दु । अले थ्वहे लिधंसाय्, लिपा देशयागु नां बौद्धक 'नेपाल संबत्' यागु प्रादुर्भाव जुसेलि थथे धयागु थनी १११० दँ न्ह्यःहे नेवाः भाषायागु परिमार्जित रूप नं व्वल्हने धुकूगु खने दत्त । नेपाल संबत् २३५ सं च्वयातःगु यलया रुद्रवर्ण महाविहारस लुयाबोगु छगू तालपत्रय्

भुजिर्मोल लिपिस विहार विषयक स्थिति बन्देजयागु विवरण नेवाःभाषा बियातःगु प्राप्त जूगुलि नेवाः भाषायागु थुजोगु परिमाजित संरचना पिदनेत श्व ई (ने. सं. २३१) या न्ह्यःहे नेवाःभाषायात लिखित रूपय् छयलेगु प्रचलन दयेधुंकूगु खनेदु । मालेज्या न्ह्याकावं यंकैबलय् ने. सं. २३५ स्वयानं पुलांगु नेवाः भाषाया लिखित विवरण लुयावयेकु । हानं नेपाल संवत् ४९६ स तालपत्रय् नेवाःभाषा च्वयातःगु हरमेखला ग्रन्थ, तथा ने. सं. ५०२ स नेवाः भाषायात 'नेपाल भाषा' धकाहे न्ह्यथनातःगु अमरकोश लुयावोगु जुल । थये धायेबलय् प्राचीन समयस अर्थात् जुजु शङ्करदेवनिसें जुजु जयस्थिति मल्लया पर्याय दुने नेपाल संवत्या प्रचलनया ल्यूल्यु नेवाःभाषायागु विकास क्रमय् भुजिम्बः, ग्वःम्ब, कुम्बः, हिम्बः, लिनुम्बः, क्वेम्बः, पाचुम्बः, रञ्जना आदि नेवाःभाषाय् छयलातःगु थीथी कलात्मक लिपियागु नं विकासक्रम न्ह्याये धुंकूगु खने दु । जुजु जयस्थिति मल्लया पर्यायस च्वयातःगु नेपाःया आःतकया दकसिबय् पुलांगु तथा प्रामाणिकगु “गोपाल राज बंशावली” नं भुजिम्बल लिपिस संस्कृत भाषाया ल्यूल्यु उकी नेवाःभाषायात नं दुध्याकातःगु जुल । अनलि १४ गूगु शताब्दी पाखे जुजु जयस्थिति मल्लया पर्याय लिपा ला थौंयागु प्रचलित नेवाःभाषाया लिपि आपलं प्रचलनय् बल, अले शिलालेख आदि च्वकीबलय् संस्कृत भाषाहे छयलेगु पद्धति कायम यासां संस्कृतया ल्यूल्यु 'अथ नेपाल भाषा लिख्यते' धकाः नेवाः भाषां नं विवरण च्वयेगु याना-हल । लिपा, मुकं नेवाःभाषाहे शिलालेख च्वयेगु, थी थी विषयवस्तुया ग्रन्थ च्वयेगु पद्धति नं ब्वलहंगु जुल । नेपालभाषा साहित्यया इतिहासय् प्याखं च्वमि रणजीत मल्ल जुजु छहोसिनं जकहे नं च्वयाथकूगु २२ गु नाटक प्राप्त जूगु दु । थुकि नेवाःभाषाया प्राचीन साहित्य गुलि तःमि धइगु स्पष्ट जूगु दु । थुकि याना नेवाःभाषायागु थःगुहे लिपि, थःगुहे ज्ञान विज्ञान धर्म दर्शनया साहित्य धुकू तःमि जुजु बल । नेवाः भाषाया माध्यमं नं नेपाःदेयागु संस्कृति ब्वलहंकल ।

शाहकालयागु प्रारम्भिक ई तकनं नेवाःभाषायागु सरकारी मान्यता च्वनन्हाना च्वंगु जुल । जुजु श्री ५ बडामहाराजाधिराज पृथ्वीनारायण शाहया

काय् जुजु श्री ५ प्रतापसिंह शाहया पालय् नेपाल संवत् ८९५ स नेपाल व्र
तिव्रतया दश्वी गुगु सन्धि जुल व सन्धियागु पूर्ण विवरण नेवाःभाषांहे
श्रीपचारिकताकथं च्वःगु जुल । साहित्यिक रचना विधिया ख्यलयनं शाह जुजु-
पिन्सं नेवाःभाषायागु महत्व व प्रासाद गुण श्वीकाः सीकाः श्वहे भाषां
साहित्यिक रचना याइगु जुयाच्वन । जुजु श्री ५ राजेन्द्र विक्रम शाहनं नेवाः
भाषां च्वयाबिज्याःगु “महासत्व” नाटक थुकीयागु उल्लेखनीय दसू खः ।
थथेहे मुख्त्यार भीमसेन थापाया किजा प्रधान सेनापति रणवीरसिंह थापां
‘अभयानन्द’ या नामं नेवाःभाषां गुलिखे दार्शनिक म्ये च्वयावंगु जुल । थुकिं
सी दु- नेवाःभाषायात केवल नेवाःतय्संजक मांभाय्या रूपय् येकूगु व छचःगु
मखु, नेवाःभाषा मांभाषा मजूपिं नेवाः इतरया मनूतय्संतकनं येकूगु व छचःगु
जुयाच्वन ।

थौं नेवाःभाषाय् प्राचीन ज्ञान विज्ञान धर्म दर्शन व साहित्यया धुकू
जक मखु, अर्वाचीन ज्ञान विज्ञान व साहित्यिक धुकू नं न्हियान्हिथं जाया
वयाच्वंगु जुल । प्राथमिक व माध्यमिक विद्यालयस नेवाःभाषाया कयाः ब्वनेगु
विषयस आपालं पंगलः दनिंसां, त्रिभुवन विश्वविद्यालयया क्याम्पस स्तरे
प्रमाणपत्र व डिप्लोमाया तहलय् नेवाःभाषायागु पठन पाठन बांलाक दुध्याका-
तःगु दु, हनं त्रिभुवन विश्वविद्यालयं पाटन संयुक्त क्याम्पसय् नेवाःभाषा
(नेपाल भाषा) या स्नाकोत्तर एम. ए. क्लास चालू यानातःगु जुल । नेवाः
भाषा व साहित्यया विषयस शोधकार्य याईपिं, विद्यावारिधि (Phd.) यागु
लागि अध्ययन अन्वेषण याईपिं स्वदेशी व विदेशी विद्वान् विदुषीपिं नं यक्वों
दयेधुंकल । नेवाःभाषा विषयक भाषा विज्ञानया क्षेत्रय् न्हून्हुगु मालेज्या
न्ह्याकाच्वंपिं संघसंस्था व व्यक्तिपिं यक्वों दुगुजुल । अन्तर्राष्ट्रिय क्षेत्रय् जुइगु
भाषा विज्ञान विषयक गोष्ठीस नं नेवाःभाषा सम्बन्धी आपालं चर्चा परिचर्चा
जुइगु जुयाच्वन ।

नेपाल अधिराज्यया थी थी अञ्चलय् च्वंपि चीन सँय्भाय् खलकय्
दुध्याना च्वंपि अथवा सँज्-वर्मी भाय्या दुने लानाच्वंपि गुरूङ्गतय्गु मांभाय्
गुरूङ्गभाय्, अथेहे सेर्पातय्गु मांभाय् सेर्पाभाय्, मणःतय्गु मांभाय् मणःभाय्,

राईतय्गु मांभाय् राई भाय्, लिम्बूतय्गु मांभाय् लिम्बू भाय्, तामाङ्गतय्गु मांभाय् तामाङ्ग भाय्, चेपाङ्गतय्गु मांभाय् चेपाङ्ग भाय्, थकालीतय्गु मांभाय् थकाली भाय्, धिमालतय्गु मांभाय् धिमाल भाय् जुयाच्च्वंनतु' नेवाःतय्गु मांभाय् नं नेवाः भाय् (नेवार भाषा) जूगु खः । अथेला नेवाःभाय्यागु प्राचीन साहित्यिक नां "नेपाल भाषा" नं खः । आः थौं कन्हें नेवाःजाति-इतरयापि मनूतसें थ्व नेवाःभाय्यात नेवार भाषा मधासे 'नेवारी' धकाः छ्यलाहयाच्च्वंगु जुल । शायद थथे धायेगु चलन भारोपेली भाषा प्रकृतिकथं खँय्भाय् (नेपाली) ल्हाइपिसं पाल्पायात पाल्पाली, गोर्खायात गोर्खाली, नेपालयात नेपाली धायेयेंनतु' नेवारयात 'नेवारी' याना ब्यगु जुइफु । अथेला भाषाविद् कोशकार राल्फ टर्नरं नेपाःया प्रमुख भाषाया नांया धलखय् खसः, गुरुङ्ग, मगर, राई, लिम्बू, मुर्मी भाषा सरह नेवाःतय्गु मांभाषायात नेवार भाषा धकाहे उल्लेख यानातःगु जुल । लिपा छुं दशक थुखे नेवाः जातिया भाषा, साहित्य व संस्कृतिविषयक अध्ययन अन्वेषण याःवोपि विदेशी विद्वान्तय्सं नेवाःतय्गु वंशगत जातीय पुर्ख्यौली मांभाषा नेवाः भाषा (नेवार भाषा) यात अंग्रेजतसें नं 'नेवारी' धायेगु यानाहल, जर्मनतसें धाःसा "नेभारी" अथेहे हानं जापानीतसें "नेवारुगो" धायेगु यानाहल । हानं थथेहे सँब्रतय्सं 'भेह्लूलकय्', चिनियातय्सं "नेवाअरवन्" धकाः नेवाःभाय्यात नांछुत । आः जुलं थौं सरकारी स्तरहे नं नेवाःभाय्यात नेवार भाषा धायेगु मयासे 'नेवारी' धायेगु यानाहल । रेडियो नेपालं न्हियान्हिथं समाचार न्यंकी-बलय् 'नेवारी' धकाहे छ्यलाच्च्वंगु जुल ।

तर नेवाःतय्गु लागि धाःसा थ्व "नेवारी" धइगु खँग्वः उच्चारण यायेत साप ज्यामछि, हानं उच्चारण यायेबलय् कर्णकटुथें जुइगु, च्वयेबलय् छ्यलेबलय् नं व्याकरणसंगत नं मजुइगु । छायाःसानि सँब्र-बर्मी भाषा परिवारया दुजःभाय्या प्रवृत्तिकथं नेवाःभाषाय् नं विशेषण व संज्ञाया वहे छगू रूप नं जुइफु । अथेनं गुलि गुलि नेवाःतय्सं अज्ञानवश अथवा परिस्थितिबश 'नेवारी' खँग्वःयातहे छ्यलाबयाच्च्वंगु जुल, थुकि नेवाः जातियागु जातीय स्वभाव, गुण व विशेषतायातहे बुलुका तइगु जुल ।

तर नेवाःभाय् मांभाय् मखुपि मेमेगु भाषा ल्हाइपि मनुतसें नेवाःतय्गु मांभाय् यात नेवाःभाय् (नेवार भाषा) मधासे 'नेवारी' धाइगु, च्वइगु यात थ्व इमिगु म्येच्चकायागु स्वभाव अथवा नांछ्वीगु स्वतन्त्रतायागु खँ जुल । थये जूगुलि सरकारी क्षेत्रं व शैक्षिक क्षेत्रं 'नेवारी' धायेगु व च्वयेगु नीति ज्वना-च्वंगु खनेदु । थुकी नेवाःतय्सं थःपिनिगु मांभाय् भात नेवाःभाय् (नेवार भाषा) अथवा नेपाल भाषा धकाः गुलि अप्पो छयलायंकीगु जुइ, उलिहे अप्पो अन्य भाषा भाषीया मनुतसें, तथा सरकारी व शैक्षिक क्षेत्रं वाःचायेका नेवार भाषा अथवा नेपाल भाषा धकाः धायेगु व च्वयेगु याना हइगु लक्षण दु । बुलुं बुलुं याना हया च्वंगु नं खने दु ।

थये थःगुहे भाषा, लिपि, साहित्य व संस्कृति ब्वल्हना च्वपि नेवाःजातिया मनुत नेपाल अधिराज्यया दुने व पिने उखे थुखे च्वना च्वसां थुमिगु ल्याः (तथ्याङ्क) गुलि दु धइगु खँ न्हापा न्हापा गनं उल्लेख यानातःगु खने मदु, केवल थ्वःखा छेँ दयेका फलानागु थासय् बस्ती दयेकल धइगु हचुवा ल्याः सम्म थाय्थासय् न्हाब्वयातःगु लुयावः । अले सम्पूर्ण नेपाल अधिराज्य-यागुहे जनसंख्या वि. सं. १९६७ स न्हापां काःगु जूसां, थ्वयागु मोठ लगत (ल्याः) सम्म प्रकाशय् हःगु खनेदु, नेपाल अधिराज्यस नेवाः जातिया मनुत थुलि दु धइगु ल्याः खने मदु । खतु उगु इलय् काःगु जनसंख्याय् नेवाःतय्गु नां, उमेर च्वयाकाः बलय् इमिगु थर नं कायम याःगुलि, थुकिनं नेवाःत थुलि दु खनि धइगु सीकेफैगु खः तर थ्व लगतहे गोप्य याना पितमब्यूगुलि नेवाः-तय्गु लगत थुलि दु धइगु सीके थाकुल । वि. सं. १९७७ व १९९८ पाखे काःगु नेपाल अधिराज्यया जनसंख्या लगतं नं कूल जनसंख्यायागु लगत सम्म पिथन, मेगु फुक लगत गोप्य यानाः पिमकाःगु जुल ।

अनलि संयुक्त राष्ट्र संघया जनसंख्या विभागं विश्व जनसंख्या सम्बन्धी तथ्याङ्क संकलनया लागि एकरूपता कायम यानाः प्रत्येक व्यक्तियागु नां, लिङ्ग, जात, उमेर, धर्म, वैवाहिक स्थिति, शैक्षिक स्थिति, भाषिक स्थिति (मांभाय् छु ? मांभाय् अतिरिक्त ल्हायेसःगु मेमेगु भाय् छु ?), आर्थिक स्थिति आदि थी थी विषय बोध याइगु मेमेगु न्हासः तयाः काइगु जनसंख्या

प्रश्नावलीयातहे आधार दयेकाः श्री ५ या सरकारनं २००६ साल पाखे पूर्वाञ्चल नेपालयागु तथा २०११ साल पाखे पश्चिमाञ्चल नेपालयागु वैज्ञानिक तरीकां अन्तर्राष्ट्रिय तुलनाय् नेपाल अधिराज्यया जनसंख्या सम्पन्न यानाः नेपाःयागु जनगणनायागु पूर्ण विवरण प्रकाशय् हर्सेलि मांभाय् (मातृभाषा) नेवाःभाय् ल्हाइपि नेवाःजातिया मनूतय्गु ल्याः (तथ्याङ्क) पिदन । नेपाल अधिराज्ययागु कूल उपस्थिति (defacto) जनसंख्या २२,३५,०३६ स नेवाःभाय् मांभाय् ल्हाइपि नेवाःतय्गु ल्याः ३,६३,१६४ कायम जुगु खनेदत । अर्थात् उगु इलय् नेपाःयागु कूल जनसंख्याय् मांभाय्या रूपय् नेवाःभाय् ल्हाइपि नेवाःतय्गु प्रतिशत ४.७ (चार दशमलब सात) थ्यंगु क्यनातःगु जुल । हनं थुगु जनगणनाय् नेवाः जुयानं मांभाय् धाःसा नेवाःभाय् मखया मेगुहे भाषा (नेपाली भाषा अथवा मेगु भाषा) मांभाय् जूपि नेवाःतय्गु ल्याः ६,२०५ क्यनातःगु जुल ।

नेवाःतय्गु दकले न्हापां पिदंगु थ्वहे ल्याःचाःया लिधिसाय् नेवाःभाषा-यागु उगु ईया स्थिति बोध याइगु छत्वाचा खँ नेपालयागु जनगणना रिपोर्टस थथे बियातःगु थन न्ह्यथने बहःजू-

“नेपाल अधिराज्य दुने ल्हाइगु थी थी भाषामध्ये नेवाः भाषा मातृ-भाषा जूपिनिगु ल्याः ४.७ (चार दशमलब सात) प्रतिशत दु । नेवाःभाय् मातृभाषा जूपि आपलं मनूत स्वनिगल (काठमाडौं उपत्यका) स दु, अर्थात् कूल नेवाःभाय् ल्हाइपि मध्ये स्वनिगलस जक ५६ प्रतिशत दु । उकीसन ख्वपशहरया जनसंख्या अनुसार अन ६७ प्रतिशत मनूतसें नेवाःभाय् ल्हाइगु खने दु, अथेहे यलय् ७० प्रतिशत मनूतसें नेवाःभाय् मातृभाषाया रूपय् ल्हाइगु खने दु । स्वनिगःया गाँ गामय्या इलाकाय् अनया कूल जनसंख्याय् ४२ प्रतिशतं मनूतसें नेवाःभाय् ल्हाइगु खने दु, उकी मध्ये दक्सिबय् आपा येल इलाकाया गामय्, अनलि ख्वप इलाकाया गामय् व येँ इलाकाया गामय् थथे नेवाःभाय् ल्हाइपिनिगु ल्याः खने दु ।

प्रादेशिक हिसाब कथं स्वनिगलया ल्याः लिपा, पूर्व पहाडी क्षेत्र व वैदिक नेवाःतय्गु खँ न्ह्यथनेबलय् अन २० प्रतिशतं मनूतसें नेवाः भाय् ल्हाइगु

खनेदु, अथेहे पश्चिम पहाडी क्षेत्रय् ११ प्रतिशत, मध्य भित्री मधेसय् ३ प्रतिशत व पूर्व तराइ लय् २ प्रतिशत ।”

थ्व च्वय् ब्वयागु नेवाः भाषा मातृ भाषा (मां भाय्) जूपि नेवाः-तय्गु ल्याः (तथ्याङ्क) वि. सं. २०१४ सालय् संख्या विभागं (तत्कालीन Dept. of Statistics, HMG) सरकारी स्तरे पितब्यूगु खः । खतुं-२००६ सालय् पूर्वाञ्चलय् तथा २०११ सालय् पश्चिमाञ्चलय् जनसंख्या काःबलय् हे नं नेवाः मां भाय् जूपिनिगु ल्याः काःबलय् छुं भति त्रुटि च्वंवन जुइफु, अथेनं थुगु नेवाः मां भाय्यागु ल्याः (तथ्याङ्क) शीगु मां भाय्यागु आघारभूत लिधंसा जूगु जुल, छायाःसां नि, थ्व बाहेक नेवाः भाय्यागु ल्याः (तथ्याङ्क) यागु मेगु शीगु श्रोत छुं मदु ।

आः थन नेवाः जातिया मनूतय्गु लागि छगू अतिकं गम्भीरगु न्हासः दं बइ- व खः नेपाल अधिराज्यया कूल जनसंख्या न्हियान्हिथं वृद्धि जुया वनाच्वंगु कथं २००६-११ या जनगणनाया ल्याखय् २०३८ या जनगणनाया ल्याः न्हाब्वयेबलय्, नेपाःया जनसंख्याय् ६४ गू लाख अप्पो मनूत खनेदये धुंकल । थ्व हिसाबं नेपाल अधिराज्यसं च्वंपि थीथी जनजातिया मनूतय्गु इबलय् नेवाः जनजातिया मनूतय्गु ल्याः नं अवश्यहे अप्पो जुइगु जुल । थथे जुइगु स्वाभाविक नं खः । तर श्री ५ या सरकारं १०।१० दँया अन्तरे काःगुः जनगणनास मांभाय्या रूपे नेवाः भाय् ल्हाइपि नेवाःतय्गु तथ्याङ्क यागु तुलनात्मक अध्ययन यायेबलय् नेवाःतय्गु मांभाषाय् आपलं न्हास जुजुं वना च्वंगु खनेदत ।

२००६-११ यागु जनसंख्याया ल्याःकथं नेवाः भाषा मातृभाषा जुया च्वंपि नेवाःतय्गु ४.७ (चार दशमलब सात) प्रतिशत न्हापाहें थ्यनाच्वंगुली उर्कि क्वाहाँवयाः २०१८ या जनसंख्याय् ४.० चार प्रतिशत, २०२८ या जनसंख्याय् नं ४.० चार प्रतिशत, अले २०३८ या जनसंख्याय् ३.० तीन प्रतिशत कायम जूवल । थुकि नेवाः भाय् ल्हाइपि मनूतय्गु आपलं न्हास (-१.७) खनेदत । उखे खय् भाय् (नेपाली भाषा) ल्हाइपिनिगु ल्याखय् आःसा २००६।११ या जनसंख्याय् नेपाली भाय् ल्हाइपिनिगु ४८.७ (अठ-

बालीस दशमलव सात) प्रतिशत ध्यनाच्वंगुली २०३८ यागु जनसंख्याय् ५८.४ (अन्ठाउन्न दशमलव चार) प्रतिशत खनेदत, थुकि आपालं वृद्धि (+६.७) खनेदत । अझ स्वनिगःथें जाःगु नेवाः भाषाभाषी मनुतय्गु जनघनत्व दुगु थासय् २००६।११ या जनसंख्याया तथ्याङ्कय् नेवाः भाषा ल्हाइपिनिगु तथ्याङ्कस ५६ प्रतिशत कायम जुया च्वंगुली, २०२८ यागु जनसंख्याया तथ्याङ्कय् ४६ प्रतिशत तथा २०२८ यागु जनसंख्याय् हानं न्हास जुयाः ३६.५६ (उन्वालीस दशमलव छपन्न) प्रतिशत जक कायम जूवल । थ्व गथे जुयाः जूगु ? आः वइगु जेठ-आषाढ महिनास काइगु राष्ट्रिय जनगणनाय् नं नेवाःभाय् मांभाय् जूपि नेवाःतय्गु प्रतिशत वृद्धि मज्जुसे हानं न्हास हे जुल धाःसा, नेवाः जातिया समाजय् थुकियागु लिच्वः छु लाइगु जुइ । थ्व थीयागु लागि नेवाः समाजया प्रत्येक मनुखं वाःचायेकाः बिचाः यायेमाःगु खँ खः ।

नेपाःया राष्ट्रिय जनगणनाया कूल ल्याखय् मांभाय् नेवाः भाय् ल्हाइपि नेवाःतय्गु प्रतिशत थथे न्हास जुजुं वंगुया कारण थथे जुइफु ।

१. नेवाःतय्गु मां भाषा (मातृभाषा) सम्बन्धी ल्याः (तथ्याङ्क) काइबलय् जनगणना काःवइपि गणकतय्सं गुलिगुलि नेवाःतय्गु मातृभाषा ताकं 'नेपाली' हे जुइफु धकाः नेपालीभाषाया महलय् च्वइगुलि ।
२. छिकपिनिगु मांभाय् छु धकाः न्यनिबलय् गुलिगुलि नेवाःतय्सं नेवाः भाय् (नेवार भाषा=नेवारी) धकाः च्वका छवये मसःगुलि अथवा ध्वाध्वीक कने मसःगुलि ।
४. 'नेपाली' खँवः व 'नेवारी' खँवःलय् भ्रम जुइगु आपलं सम्भव दुगुलि । मातृभाषा सम्बन्धी तथ्याङ्क संकलन तथा सम्पादन याइबलय् नेवारी खँवः, नेपाली खँवःथें नं जूवनिगुलि । अथवा नेपालीया छोटकरी च्वइबलय् 'ने' च्वइगु तथा नेवारीया छोटकरी च्वइबलय् नं 'ने' च्वइगुलि नेवारी खँवः नं नेपालीया खँवःथें हे जूवनिगुलि ।
४. केन्द्रीय तथ्याङ्क विभाग मातृभाषाथें जाःगु प्रमुख विषयस न्हाथें


**नेवाः भाय् (नेपाल भाषा) मांभाय् जूपिनिगु
प्रतिशतय् न्हास (Decline)**

साल	कूल जनसंख्या	नेवाः भाय् ल्हाइपिनिगु जनसंख्या	कूल जनसंख्याय् नेवाःभाय् ल्हाइ- पिनिगु प्रतिशत
२००६।११	८२,५७,०००	३,८३,१८४	४.७
२०१८	९४,१३,०००	३,७७,७२७	४.०
२०२८	१,१५,५६,०००	४,५४,६७६	३.९
२०३८	१,५०,२२,८३६	४,४८,७४६	३.०

श्रोतः

- (i) UN, ESCAP Country Monograph Series No. 6
Population of Nepal.
- (ii) Central Bureau of Statistics पाखे पिदंगु Statistical
Pocket Book.

नेवाः भाय् (नेवार भाषा) मां भाय् जूपिनिगु
प्रतिशतय् ड्रास (Decline)




खय् भाय् (नेपाली भाषा) मांभाय् जूपिनिगु प्रतिशतय् वृद्धि (Growth)

साल	कूल जनसंख्या	खय्भाय् (नेपाली) भाय् ल्हाइपिनिगु जनसंख्या	कूल जनसंख्याय् खय्भाय् ल्हाइपिनिगु प्रतिशत
२००६।११	८२,५७,०००	४०१३५६७	४८.७
२०१८	९४,१३,०००	४७९६५२८	५१.०
२०२८	१,१५,५६,०००	६०६०७५८	५२.४
२०३८	१,५०,२२,८३६	८७६७३६१	५८.४

श्रोत—

- (i) UN, ESCAP Country Monograph Series No. 6
Population of Nepal.
- (ii) Central Bureau of Statistics पाखें पिदंगु Statistical
Pocket Book.

रवप्रभाय (नेपाली भाषा) माँभाय जूपिनिगु
प्रतिशतय वृद्धि (Growth)



**थीथी अञ्चल दुध्यानाच्चंगु क्षेत्रय् नेवाः भाय् ल्हाइपिनिगु
कूल जनसंख्याय् प्रतिशतया ल्याः
(Percentage Distribution)**

पूर्वी पहाडय्	प्रतिशत
२००६।११ सालय्	४.५
२०१८ सालय्	३.४
२०२८ सालय्	४.०
स्वनिगलय् (काठमाडौं उपत्यकास)	
२००६।११ सालय्	५५.०
२०१८ सालय्	५२.१
२०२८ सालय्	४६.२
पूर्वी तराई व भित्री मधेसय्	
२००६।११ सालय्	०.६
२०१८ सालय्	०.७
२०२८ सालय्	०.७
मध्य तराइलय्	
२००६।११ सालय्	५.२
२०१८ सालय्	५.५
२०२८ सालय्	४.०
पश्चिम, मध्य पश्चिम व सुदूर पश्चिमया तराइलय्	
२००६।११ सालय्	०.४
२०१८ सालय्	०.३
२०२८ सालय्	०.४
पश्चिमी पहाडय्	
२००६।११ सालय्	१.७
२०१८ सालय्	१.१
२०२८ सालय्	१.०

श्रोत- केन्द्रीय तथ्याङ्क विभागपाखें पिकाःगु The Analysis of the
Population Statistics of Nepal.

- जाः गु वृटि व अशुद्धि खनेदः सां सुधार यायेगु ज्याइवः मन्हाकूसै
 न्हाबलें मित्रातिसिना च्वनेगु नीति कया च्वंगुलि ।
५. गुलि गुलि नेवाः तय्सं खयाय् (नेपाली भाषा) यात हे थः गु मातृ-
 भाषा यानाः यंकुगुलि तथा नेपाली भाषायात हे थः गु मातृभाषा धकाः
 च्वका छ्वइगुलि ।
६. गुलिखे नेवाः तय्के मां भाषा (मातृभाषा) प्रतियागु ममता व चेतनाया
 अभाव जुया च्वंगुलि यानाः गणकतय्सं न्हागु हे च्वया यंकूसां वास्ता
 मयासे च्वनिगुलि अर्थात् भाषिक चेतना मदुगुलि ।
७. गुलिगुलि नेवाः तय्सं थः गु मां भाय्यात नेवाः भाय् (नेवार भाषा,
 नेपाल भाषा, नेवारी) धकाः च्वकेगुली थः त चीधं (लघुताभास)
 खंकल नं जुइफु, अले थुमिसं थः गु मां भाय् 'नेपाली' धकाः च्वकेगुली
 गौरव (गुरुताभास) तायेकल नं जुइफु ।
८. गणकतय्सं छिगु मां भाय् छु धकाः न्यनिबलय् गुलि गुलि नेवाः तय्सं
 अज्ञानतावश मां भाय्यागु नां तकनं कने मफत जुइफु ।
९. गनं गनं खयाय् (नेपाली भाषा) ल्हाइपिनिगु बाहुल्यं यानाः अन
 नेवाः भाय् ल्हाइपिनिगु ल्याः खयाय्लय् हे ल्वाकः ज्याना तनानं वन
 जुइफु ।
१०. जनसंख्या कावईपि गणकतय्सं चायेकं वा मचायेकं नेवाः भाय्यात
 त्वः फिका छ्वइगुलि (Under enumeration याइगुलि) । तथा
 'अन्य भाषा' धकाः च्वयातः गु महलय् नेवाः भाय्यात दुध्माका
 छ्वइगुलि ।
११. गुलि गुलि नेवाः तय्सं मां भाय् ल्हायेगु त्वः ता खयाय् ल्हायेबलय् थः गु
 स्तर, इज्जत थाहां वइगु मनोभावना घयेपुनातः गुलि तथा मां बीपिन्सं
 थः मचातय्त नर्सरी, किन्डर गार्टेन, पाठशालाय् बबंके छ्वयेगु त्वह-
 तयाः मचातय्त मां भाय् मस्यंसे खयाय् स्यनेगु याना हः गुलि ।
१२. कलः भाय् ल्हायेगु व ल्हाकेगु पहः न्हियान्हिं व्यापक जुजुं वयं
 च्वंगुलि ।

१३. पंहरी भाय् (पै भाय्), चिलंयाय् (चित्तिलाङ्ग पाखेया भाय्) दोलखा भाय्, प्यांग गां भाय् आदि नेवाः भाषिका ल्हाइपिन्सं थःगु मांभाय् नेवाः भाय् (नेवार भाषा) धकाः च्वका छ्वये मंसःगुलि ।
१४. शहरय् च्वंपि नेवातय्सं गांगामय् च्वंपि नेवाःतय्त गामाः भाय् ल्हाइपि तथा भाय् वयेकाः खँ ल्हाइपि धकाः हेस्याइ धइगु भावनां नेवाः भाय्या थासय् नेपाली च्वकेगुली ज्याछि ताइगुलि ।
१५. नेवाःतय्सं थ च्वना च्वनागु जिल्ला वा शहर त्वःता मेमेगु थासय् च्वंवेनेगु (Out migration) याना हःगुलि अथवा नेवाःत च्वना च्वंगु थासय् पिनेयापि मनूत च्वंवोगुलि (migration) यानाः । तर थथे बसाइँ सरे ज्वीबलय् छगू जिल्ला वा शहरय् ल्याः पाःजुल धाःसा, मेथाय् जिल्लाय् वा शहरय् ल्याः अप्पो दयेमाःगु खः । तर सीदयेक थथे जूगु खने मदु । इत्यादि ।

यदि थथे मखु धइगु जूसा— नेपाली मातृभाषा जूपिनिगु प्रतिशत धाःसा थाहां थाहां वनीगु, वृद्धि जुइगु, उखे नेवाः भाय् मांभाय् जूपिनिगु प्रतिशत धाःसा झन्झन् क्वहांक्वहां वनीगु, न्हास जुइगु । थथे मजुइमाःगु ।

वास्तवय् थःथःगु मां भाय्यागु माया धइगु सकसिके दइ । मां भाय्यागु माध्यमं हे नं थःगु मौलिक प्रतिभा ब्वलहंकाः झीसं झीगु राष्ट्रिय संस्कृति, राष्ट्रिय एकता, राष्ट्रिय विकास व राष्ट्रिय गौरव क्यनेफु । थःगु मां भाय्यात त्वःफिकल धाःसा अथवा ल्वःमंकेगु बिचाः यात धाःसा जा थःगु पुख्यौली वंश, कुल, जात व थर पाखे परम्परागत रूपं न्ह्या वयाच्वंगु नेवाः संस्कार व संस्कृति नं बुलुसे च्वनीगु जुल, नेवाः नं थःत जि 'नेवाः' धकाः हसिके बिइगु तथा थःत जि 'नेवा' धका क्यनेगु लक्षण (identity) तक नं न्हावनीगु जुल ।

थौं वंगु दैय् (ने. सं. १९९०) जूगु ऐतिहासिक जनआन्दोलनं सकल नेपामितय्गु आधारभूत मानवाधिकार सुरक्षित यानाः स्वतन्त्रता व समानताया लिधंसाय् नेपामितय्गु दशवी भ्रातृत्व र एकता कायम यानाः नेपामितय्गु हक हित व इच्छाकथं नेपाल अधिराज्ययागु सार्वभौमसत्ता नेपाःया जनता

नेपामितके हे च्वनीगु कथं नेपाल अधिराज्ययागु न्हूगु संविधान नं प्राप्त जुइ धुकल । थुगु न्हूगु संविधान कथं बहुभाषाभाषी जुयाच्चंगु नेपाः देया थी थी यासय् थी थी जनजातिया मनूतय्गु मां भाषा (मातृभाषा) यात नेपालया राष्ट्रिय भाषा धकाः घोषित याये धुकूगु दु । हनं थुगु न्हूगु संविधानया मौलिक हक कथं थीथी मां भाय् ल्हाइपि मचातय्त थःथःगु मां भाषां प्राथमिक शिक्षा विइगु विद्यालय सञ्चालन यायेगु हक नं ब्यूगु दु । आः झी नेवाः मचातय्त मां भाषा नेवा भाषां आखः स्यनेगु पाप मखु, छगू वरदान जूवोगु दु । छायाःसानि थःगु मांभाषं थःगु ज्ञान गुण व प्रतिभा गुलि अप्पुन ब्वल्हंके फई उलि मेगु माध्यमं अप्पुन ब्वल्हंके थाकुइ । हनं थुगु हे न्हूगु संविधानं शिक्षा व संस्कृतिया लागाय् मौलिक हक कथं थःथःपिनिगु मां भाषा, थःथःपिनिगु लिपि व थःपिनिगु संस्कृति संरक्षण यायेगु, सम्बर्द्धन यायेगु अधिकारनं ब्यूगु दु ।

थौंयागु ध्व परिप्रेक्ष्य नेवाः भाषा थःगु मां भाषा जुयाच्चपि नेवाः-तय्सं थःगु मांभाषायागु उत्थान व विकासया लागि भाषिक चेतना व जागरण ब्वल्हंके माल । नेवाःनं हे नेवाः भाय्या लागि फूगुचाःगु ग्वहालि मयासा नेवाः नं जि नेवाः धकाः परिचय प्रस्तुत यायेगु हे गथे ?

आखिर नेवाःनं जि नेवाः खः धकाः परिचय विइगु छगू जक-मूलगु माध्यम खः जिगु मां भाय् (मातृभाषा) नेवाः भाय् (नेवार भाषा) धायेगु ।

अकें झी सकल नेवाः जातिया मनूतसं आः वइगु जेठ-आषाढ महिनास काइगु नेपाल अधिराज्ययागु राष्ट्रिय जनगणनास झी नेवाःतय्सं नेवाःतय्गु जात जाति व मां भाय् (मातृभाषा) सम्बन्धी न्ह्यसःयागु पाय्छि लिसः बिइ फयेके माल, गथे कि—

राष्ट्रिय जनसंख्या फारामय् महल नं ३ स थथे न्ह्यसः न्यनातःगु दइ—

छि गुगु जात वा जाति दुने लाःह्य ?

थुकी झी नेवाःतय्सं 'नेवार' धका च्चकाःछ्वयेमाल ।

हानं राष्ट्रिय जनगणनाया फारामय् महल नं ८ स थये न्ह्यसः न्यतातःगु
दइ-

छि ल्हायेगु मा भाषाया नां छु ।

थुकी झी नेवाःतय्सं अन फारामय् १ नेपाली / २ मैथिली /
३ भोजपुर / ४ नेवारी / ५ थारु / ६ तामाङ / ७ अन्य । थये च्वयातइगुली
४ नेवारी धयातःगुली अन बियातइगु नियमकथं ४ यागु अङ्कयात ग्वःलाःगु
चि तयाः थये च्वकाःछ्वयेमाल (४) नेवारी ।

राष्ट्रिय जनगणनाया फारामय् थुलि खे क्वातुक झी नेवाःतय्सं च्वका
छ्वये फत धाःसा नेवाः जात जातियागु ल्याः व मांभाय् (नेवाः भाय्, नेवार
भाषा, नेपाल भाषा) यागु ल्याः पाय्छि कथं कायम जूवइ । थुकी झी
नेवाःतय्सं इलय् हे न्ह्यलं चायेकेमाल ।

